



Rhaglen sgrinio smotyn gwaed newydd-anedig

Canlyniad sgrinio eich babi

Amheuir asidwria glwtarig math 1 (GA1)

Canlyniad sgrinio eich babi

Mae canlyniad prawf gwaed sgrinio 'pigo sawdl' eich babi yn awgrymu y gallai fod ganddo asidwria glwtarig math 1 (GA1). Mae angen profion pellach ar eich babi nawr i weld a oes ganddo GA1 ai peidio.

Mae'r daflen hon yn rhoi rhywfaint o wybodaeth am GA1 ac yn esbonio beth sy'n digwydd nesaf.

Beth yw GA1?

Mae asidwria glwtarig math 1 (GA1), sy'n cael ei ynganu fel asid-wr-ia glw-tarig, yn anhwylder wedi'i etifeddu prin ond y gellir ei drin sy'n atal y broses arferol o ymddatod protein.

Mae babanod sydd â GA1 yn etifeddu dau gopi diffygiol o'r genyn ar gyfer GA1, un gan bob rhiant.

Pan fyddwn yn bwyta, mae ein corff yn ymddatod protein mewn bwyd a'i droi'n rhannau llai o'r enw asidau amino. Mae cemegion arbennig a geir yn naturiol yn ein corff, o'r enw ensymau, yna'n gwneud newidiadau i'r asidau amino fel y gall ein corff eu defnyddio.

Nid oes gan fabanod sydd â GA1 un o'r ensymau sy'n helpu i ymddatod rhai o'r asidau amino. Mae hyn yn achosi i sylweddau niweidiol gronni yn eu gwaed a'u wrin.

Mae babanod sydd â GA1 yn cael budd sylweddol o driniaeth gynnar a gallant fyw bywydau iach ac egnïol.

Heb ddiagnosis a thriniaeth gynnar gallant ddatblygu salwch difrifol a niwed i'r ymennydd.

Triniaeth

Gellir trin GA1 â deiet protein isel arbennig ac atchwanegiadau deietegol. Mae hyn yn atal sylweddau niweidiol rhag cronni. Efallai y bydd eich babi yn cael meddyginiaeth hefyd.

Mae'n bwysig bod babanod sydd â GA1 yn bwydo'n rheolaidd ac nad ydynt yn mynd am gyfnodau hir heb fwyta. Mae angen iddynt hefyd weld eu tîm metabolig arbenigol yn rheolaidd.

Os yw eich babi'n sâl mewn unrhyw ffordd, mae'n bwysig dilyn cyngor meddygol. Pan fyddant yn anhwylyd efallai y bydd angen iddynt fynd i'r ysbyty i gael triniaeth. Dylech fynd ag unrhyw wybodaeth sydd gennych am GA1 gyda chi.

Beth sy'n digwydd nesaf?

Byddwch yn cael apwyntiad i weld tîm metabolig arbenigol a fydd yn:

- trafod canlyniad y prawf sgrinio gyda chi
- trefnu profion gwaed ac wrin ar gyfer eich babi, ac
- egluro sut y gall y profion hyn gadarnhau a oes gan eich babi GA1.

Os caiff GA1 ei gadarnhau, bydd eich tîm metabolig arbenigol yn:

- esbonio sut i roi'r deiet protein isel arbennig i'ch babi (os yw eich babi'n cael ei fwydo ar y fron, gallwch barhau i fwydo ar y fron)
- rhoi unrhyw atchwanegiadau deietegol arbennig a meddyginiaethau y bydd eu hangen ar eich babi.
- esbonio sut i ddefnyddio bwydo brys yn ystod salwch a beth i'w wneud os nad yw eich babi'n bwydo'n dda
- rhoi gwybodaeth ysgrifenedig i chi am GA1 i chi ei rhannu â'ch teulu, meddyg teulu a'r ysbyty lleol
- ateb unrhyw gwestiynau a allai fod gennych,
- trefnu apwyntiad dilynol i drafod canlyniadau'r profion.

Os ydych yn pryderu am fwydo gwael neu fod eich babi'n sâl, cysylltwch â'ch tîm metabolig arbenigol.

Ateb eich cwestiynau

Sut y byddaf yn gwybod a yw fy mabi'n sâl a beth ddylwn i ei wneud?

Nid yw babanod sydd â GA1 yn aml yn mynd yn sâl yn ystod wythnosau cyntaf bywyd. Fodd bynnag, os oes ganddynt haint, gyda symptomau fel tymheredd uchel neu boen bol, efallai y bydd GA1 yn achosi symptomau eraill.

Efallai na fydd babi sâl yn bwydo'n dda, gall fod yn gysglyd, yn chwydu, yn datblygu anawsterau anadlu ac yn mynd yn oer.

Ni ddylech anwybyddu'r symptomau hyn. Os na chaiff ei drin, gall babanod sydd â GA1 gael ffitiau a mynd i goma, sy'n gallu peryglu bywyd.

Os ydych yn poeni bod eich babi yn sâl, cysylltwch ag aelod o'ch tîm metabolig arbenigol. Os na allwch gysylltu â'ch tîm metabolig arbenigol dylech fynd â'ch babi i'ch adran damweiniau ac achosion brys leol cyn gynted â phosibl.

Dylech fynd ag unrhyw wybodaeth a roddwyd i chi am GA1 i'r ysbyty gyda chi.

Rhagor o wybodaeth a chymorth


- Mae Metabolic Support UK (Y Ganolfan Wybodaeth Genedlaethol ar gyfer Clefydau Metabolig) yn darparu gwybodaeth a chymorth i bobl sydd â GA1 a'u teuluoedd:
www.metabolicsupportuk.org
- Sgrinio Smotyn Gwaed Newydd-anedig Cymru:
icc.gig.cymru/sgrinio-smotyn-gwaed-newydd-anedig

Manylion cyswllt ar gyfer eich tîm metabolig arbenigol

Canolfan arbenigol	
Meddyg ymgynghorol	
Deietegydd metabolig	
Nyrs glinigol arbenigol	
Ward (os yw hyn yn berthnasol)	

Nodiadau

Gallwch ysgrifennu unrhyw nodiadau yma o drafodaethau gyda'ch gweithwyr iechyd proffesiynol.



Defnyddio eich gwybodaeth

Er mwyn i ni gysylltu â chi fel rhan o'r rhaglen, bydd angen i ni ymdrin â rhywfaint o'ch gwybodaeth bersonol chi a'ch babi. Os bydd angen rhagor o wybodaeth arnoch am hyn, gallwch:

- fynd i'r wefan: icc.gig.cymru/defnydd-y-safle/hysbysiad-preifatrwydd
- anfon e-bost PHW.InformationGovernance@wales.nhs.uk, neu
- ffonio 029 2010 4307.

Rydym hefyd yn cadw manylion personol i sicrhau bod safon ein gwasanaeth mor uchel â phosibl. Mae hyn yn cynnwys gwirio cofnodion eich babi os canfyddir bod gan eich babi gyflwr ar ôl cael prawf sgrinio a ddangosodd ganlyniad 'dim achos a amheuir'.

Dim ond fel ystadegau rydym yn cyhoeddi gwybodaeth ac nid ydym byth yn cyhoeddi manylion personol. Rydym yn trosglwyddo eich gwybodaeth bersonol i weithwyr iechedd proffesiynol neu sefydliadau y mae ei hangen arnynt, gan gynnwys eich meddyg teulu, ymwelydd iechedd a phediatregydd ymgynghorol. Rhaid i'r gweithwyr proffesiynol hyn ddiogelu'r wybodaeth bersonol yn yr un modd ag y byddwn ni.

Mae ein holl gofnodion papur a chyfrifiadurol yn cael eu storio a'u prosesu'n ddiogel, ac ni all y cyhoedd gael mynediad atynt.

© Hawlfraint 2020 Ymddiriedolaeth GIG Iechyd Cyhoeddus Cymru. Cedwir pob hawl. Ni ddylech atgynhyrchu unrhyw ran o'r daflen hon heb ein caniatâd.

Gwybodaeth drwy garedigrwydd Iechyd Cyhoeddus Lloegr.